

全上古三代秦漢
三國六朝文

漢三國

第三
玉十冊

全後漢文卷七十一

烏程嚴可均校輯

蔡邕

三

上始加元服與羣臣上壽章

伏惟陛下應天淑靈丁其中興誕在幼齡聖姿碩義威儀孔備俯仰龍光顏如日星言稽典謨動蹈規矩緝熙光明思齊周成早智夙就參美顯宗令月吉日始加元服進御幘結已章天休臣妾萬國遐邇大小一心同歡同喜逸豫式歌且舞臣等不勝踴躍鳧藻謹奉牛一頭酒九鍾稽首再拜上千萬壽陛下享茲吉福永守皇極通遵太和靖綏六合宜民宜人受祿于天書曰一人有慶兆民賴之其寧惟永詩曰颙颙卬卬如珪如璋令聞不忘萬壽無疆

本集

又略見書鈔一百二十七引蔡邕雜章

表賀錄換誤上章謝罪

今月十八日臣已相國兵討逆賊故河內太守王匡等屯陳破壞
斬獲首級詣朝堂上賀臣邕奉賀錄故羽林郎將李參遷城門校
尉而署名羽林左監右衛在朝堂而不在錄咎在臣不詳省案使
參已亡爲存衍已存爲亡錯奏謬錄不可行侍御史劾臣不敬當
賜刑書懲戒不恪陛下天地之德不辱收戮丙辰詔書已一月俸
贖罪臣邕怔營慙怖屏氣累息不知所自投處臣邕頓首死罪臣
不惟石慶數馬之誤簡忽校讎不謹之愆雖見原宥仰愧先臣傷
肌入骨不勝忪蒙流汗

本集

讓高陽鄉侯章

制詔左中郎將蔡邕今封邕陳畱雍丘高陽鄉侯下印綬符策假
限食五百戶歲五十萬穀各米臣稽首受詔怔營喜懼精魄播超
恍惚如夢不敢自信臣伏惟糠粃小生學術虛淺少竊方正長麻
宰府備數典城著作東觀無狀取罪捐棄朔野蒙恩徙還退伏賦

畝復階朝謁進察憲臺遂充機密令守巴郡還備侍中車駕西還
執鞭跨馬及看輪轂升輿下軫扶接聖躬既至舊京出備郎將中
外所疑對越省闔羣臣之中特見褒異訖無雞犬鳴吠之用常已
汗墨愧負恩寵誠不意寤猥與公卿已下錄功受賞命服金紫爵
至通侯非臣草萊功勞微薄所當被蒙臣邕頓首死罪臣十四世
祖肥如侯佐命高祖已受爵賞統嗣曠絕除在匹庶臣子遺苗裔
復蒙顯封前功輕重不侔慙惶累息無心怡寧唐虞之朝猶美三
讓臣者何人受而不讓臣不勝戰悼惶惕詣闕拜章上所假高陽
鄉侯印綬符策伏受罪誅臣得微勞被受爵邑光寵榮華耀炤祖
禰非臣小族陋宗器量褊狹所能堪勝非臣力用勤勞有所當受
誠無安寧甘悅之情拘迫國憲下不敢逆苟順恩旨退省金龜紫
綬之飾非臣容體案書鈔一百三十一引漢末雜事作非臣庸體所當服佩中讀符策誥
戒之詔非臣才量所能祇奉昧日彌久震懼益甚臣聞高祖受命

元功翼德與共天下者爵土故曰使黃河若帶太山若礪國已永
存爰及苗裔夫山河至大猶謂之小重功輕賞如此其至也是已
戰功之事大有陷堅破敵斬將搃旗之功小有馘截首級履傷涉
血之難勤苦軍旅連年累歲首如蓬葆體如漆幹勞瘁辛苦如此
其重也已受爵土誰曰不宜今者聖朝遷都應順天人奔走之役
臣僕職分宜然臣事輕葭莩功薄蟬翼臣恐史官錄書臣等在功
臣之列陷恩澤之科垂名後葉作戒末嗣非本朝之德政遇臣之
長策臣是已宵寢晨興叩膺增歎心煩慮亂喘呼息吸且鷦鷯巢
林不過一枝鷺鼠飲河不過滿腹小人之情求足而已不勝大願
乞如前章云云臣忝自參省資非哲人藩屏之用器非殿邦佐君
之才憂心灼烜耳目昏盲忪蒙蔽罔累息屏氣臣聞稷契之疇已
德受命功德靡堪讓所不如昔之范丐不忘禮讓其下化之春秋
采焉臣小醜不足勸勵已躡高蹤已詩人斯亡之戒觀見符策君

國之誨兩印雙紱竝在螭帶至德元功器量宏大猶且跼蹐無心
寧止況臣螻蟻無功德而散怠茸闕何已居之且晏嬰辭郕殿之
邑張良辭三萬之戶書籍紀之曰爲美談夫人君無弄戲之言憲
法有誣枉之効臣不敢違戾飾虛已詎上旨疑確之誠與神明通
謹奉章詣闕頓首敢固已請息伏惟畱漏刻一省僵沒之日同壽
松喬

本集案張溥百三家集割分
臣忝自參省已下爲再讓表

薦太尉董卓可相國并自乞閒冗章

臣某等聞周有流彘之亂而宣王已興漢有昌邑之難而中宗已
昭由此觀之天生神聖特已靖亂整殘丕誕洪業輔佐重臣國之
楹棟生應期運稟氣山嶽是故申伯山甫列于大雅蕭曹邴魏載
于史籍國遭奸臣孽妾制弄主權累葉相繼六十餘載火熾流沸
浸已不振威移羣下福在弄臣海內嗷嗷被其傷毒故大將軍愼
侯何進盡忠出身圖議盪滌已清季朝羣凶遘難兵起亂作元舅

上卿先寇受害禍至執辱社稷傾危太尉郗侯卓起自東土封畿
之外義勇憤發旋赴京師先陳便宜列表奸猾羣慝情狀辭意激
切感物寤靈精兵虎臣承持卓勢奪擊醜類漏刻之間靡有孑遺
卓聞乘輿已趨河津身率輕騎長驅芒阜上解國家播越之危下
救兆民塗炭之禍然後黜廢頑凶爰立聖哲天心聿得萬國賴祐
及至差功行賞辭多受少近臣幸臣一人之封戶至萬數今者受
爵十有一人總合戶數千不當一非所已褒功賞勳也今月七日
卓又上書辭疾讓位乞就國土上違聖主寵嘉之至下乖羣心瞻
仰之望臣等謹案漢書高祖受命案此下流離藏竄十有二年陞
下應期中興龍飛踐阼奸臣嬖孽一時殄盡憎疾臣者隨流埋沒
太尉郗侯卓收拾洗濯上臣高第補侍御史轉治書御史陛下天
地之大德聽納大臣扶飾文學遂用臣豈充備機密三月之中充
歷三臺光榮昭顯非臣愚蔽不才所當盜竊非臣碎首糜軀所能

補報如卓者陛下當益隆委任數加訪問厚其爵賞責曰相業之
成臣等不勝大願謹陳狀臣邕等頓首頓首死罪死罪臣聞世宗
之時田千秋有神明感動至一言曰寤聖聽昭發上心故有一日
九遷臣邕草萊小臣思謀愚淺生非千秋職不狎練加曰新來入
朝不更郎署攝省文書其猶面牆陛下統繼大業委政冢宰太傅
隗曰舊典入錄機密事尚書令曰碑先輩舊齒德更上公僕射允
故司隸校尉河南尹尚書張熹已歷九列魯旭侍中牧守宣藩剖
符數郡唯臣官薄微賤特單匹此六臣臣當自知況于論者將謂
臣何足曰任夙夜寤歎寐息屏營無顏曰居無心曰寧明時階級
人所勸慕乞在他署抱關執籥曰守漏刻則臣之心厭抱釋降榮
于悴退顯于進不勝區區疑戒不敢肅飾

本集案張溥百三家
集剖析流離藏竄曰下

至所能補報及臣邕頓首至
未別爲一篇與本集不同

雜章

相國金印綠綬位在公上所曰殊異休烈羣臣莫得而齊

書鈔一百三十一

一御覽六百八十二

薦皇甫規表

臣聞唐虞曰師師咸熙周文曰濟濟爲寧區區之楚猶用賢臣爲寶衛多君子季札知其不危由此言之忠臣賢士國家之元龜社稷之楨固也昔孝文愠匈奴之生事思李牧于前代孝宣忿奸邪之不散舉張敞于亡命況在于當時謙虛爲罪而可遺棄臣伏見護羌校尉皇甫規少明經術道爲儒宗修身力行忠亮闡著出處抱義皦然不污藏器林藪之中曰辭徵召之寵先帝嘉之羣公歸德盜發東嶽莫能嬰討卽起家參拜爲泰山太守屠斬桀黠綏撫熒弱青兗之郊迄用康乂自是曰來方外有事戎狄猾華進簡前勳連見委任伏節舉麾威靈神行演化凶悍使爲慙愿愛財省穡每有餘資養士御眾悅曰亡死論其武勞則漢室之干城課其文

德則皇家之心腹誠宜試用已廣振鷺西雍之美臣已頑愚忝汚
顯烈輒流汗墨不堪之責不勝區區執心所見越職瞽言罪當死
唯陛下當留神宥察臣邕頓首頓首

本集藝文類
聚五十五

爲陳畱太守奏上孝子程末事表

臣前到官博問掾史孝行卓異者臣門下掾申屠負稱孝子平丘
程末年十四歲時祖父叔病歿未抱伏叔尸號泣悲哀口乾氣少
喘息纔屬舅偃哀其羸劣嚼棗肉已哺之末見食歔歔不能吞咽
麥飯寒水閒用之舅偃誘勸哽咽益甚是後精美異味遂不過口
常在柩旁耳聞叔名目應已淚前太守文穆召署孝義童云已叔
未葬不能至府舍臣輒核問掾史邑子殷盛宿彥等辭驗皆合臣
卽召來見末年十四歲顏色瘦小應對甚詳臣問樂爲吏否垂泣
求去白歸喪所臣爲設食但用麥飯寒水不食肥膩舅本已田作
爲事家無典學者其志行發于自然非耳目聞見所做効也雖成

人之年知禮識義之士恐不能及伏唯陛下體因心之德當中興之運躬秉萬機建用皇極神紀騁于無方淑暘洽于羣生故醇行感時而生美義因政已出清風奮揚休徵誕漫太平之萌昭驗已著臣誠伏見幸甚臣聞魯侯能孝命于夷宮張仲孝友侯在左右周宣之興實始于此且烏已反哺託體太陽羔已跪乳爲贄國卿禽鳥之微猶已孝寵況末稟純粹之精爽立百行之根原其人殄瘁而德曜彌光其族益章臣不勝願會使末美昭顯本朝謹陳狀臣頓首

本集御覽五百二十一引蔡邕進表九百六十五引蔡邕奏事

巴郡太守謝表

臣尚書邕免冠頓首死罪臣猥已頑闇連值盛時超自羣吏入登機密未及輸力盡心日下五府舉臣任巴郡太守陛下不復參論府舉入奏驚惶失守非所敢安征營累息不知所措臣邕頓首死罪知納言任重非臣所得久忝今月丁丑一章自聞乞閑冗抱關

執籥不意錄符銀青授任千里求退得進後上先遷爲眾所怪不合事宜願乞還詔命盡力他役死而後已臣猥冒愚暗盜竊明時周旋三臺充列機衡出入省闈登踏丹墀承隨同位與在行列已受酒禮嘉幣之賜詔書前後賜石鏡匳禮經素字尙書章句白虎議奏合成二百一十二卷及蓮香瓠子薰爐唾壺彈碁石秤梨餚汁器園廬諸物誠念及下錫惠周至每敕勿謝朝廷之恩前後重疊雖父母之于子孫無已加此未得因緣有事荅稱所蒙不意卒遷荷受非任臨時自陳未蒙省許慘結屏營跼蹐受拜命服銀青光寵休顯上耀祖先下榮昆裔誠非所望臣邕頓首死罪巴士長遠江山修隔頃來未悉輯睦劉焉撫寧有方柔遠功著臣當已頑蒙不閑職政宣暘聖化導遵和風非臣才力所能供給必已忝辱煩污聖朝幸循舊職當竭肝膽從事筋絕骨破已命繼之

本集御覽七百

上封事陳政要七事

臣伏讀聖旨雖周成遇風訊諸執事宣王遭旱密勿祇畏無已或加臣聞天降災異緣象而至辟厯數發殆刑誅繁多之所生也風者天之號令所已教人也夫昭事上帝則自懷多福宗廟致敬則鬼神已著國之大事實先祀典天子聖躬所當恭事臣自在宰府及備朱衣迎氣五郊而車駕稀出四時至敬屢委有司雖有解除猶爲疏廢故皇天不悅顯此諸異鴻範傳曰政悖德隱厥風發屋折木坤爲地道易稱安貞陰氣憤盛則當靜反動法爲下叛夫權不在上則雹傷物政有苛暴則虎狼食人貪利傷民則蝗蟲損稼去六月二十八日太白與月相迫兵事惡之鮮卑犯塞所從來遠今之出師未見其利上違天文下逆人事誠當博覽眾議從其安者臣不勝憤懣謹條宜所施行七事表左

一事明堂月令天子已四立及季夏之節迎五帝于郊所已導致

神氣祈福豐年清廟祭祀追往孝敬養老辟雍示人禮化皆帝者之大業祖宗所祇奉也而有司數言蕃國疏喪宮內產生及吏卒小汚屢生忌故竊見南郊齊戒未嘗有廢至于它祀輒興異議豈南郊卑而它祀尊哉孝元皇帝策書曰禮之至敬莫重于祭所已竭心親奉已致肅祇者也又元和故事復申先典前後制書推心懇惻而近者已來更任太史忘禮敬之大任禁忌之書拘信小故已虧大典禮妻妾產者齊則不入側室之門無廢祭之文也所謂宮中有卒三月不祭者謂士庶人數堵之室共處其中耳豈謂皇居之曠臣妾之眾哉自今齊制宜如故典庶答風霆災妖之異二事臣聞國之將興至言數聞內知己政外見民情是故先帝雖有聖明之姿而猶廣求得失又因災異援引幽隱重賢良方正敦朴有道之選危言極諫不絕于朝陛下親政已來頻年災異而未聞特舉博選之旨誠當思省述修舊事使抱忠之臣展其狂直已

解易傳政悖德隱之言

三事夫求賢之道未必一塗或曰德顯或曰言揚頃者立朝之士曾不曰忠信見賞恆被謗訕之誅遂使羣下結口莫圖正辭郎中張文前獨盡狂言聖聽納受曰責三司臣子曠然眾庶解悅臣愚曰爲宜擢文右職曰勸忠謇宣聲海內博開政路

四事夫司隸校尉諸州刺史所曰督察姦枉分別白黑者也伏見幽州刺史楊憲益州刺史龐芝涼州刺史劉虔各有奉公疾姦之心憲等所糾其効尤多餘皆枉撓不能稱職或有抱罪懷瑕與下同疾綱綱弛縱莫相舉察公府臺閣亦復默然五年制書議遣八使又令三公謠言奏事是時奉公者欣然得志邪枉者憂悻失色未詳斯議所因寢息昔劉向奏曰夫執狐疑之計者開羣枉之門養不斷之慮者來讒邪之口今始聞善政旋復變易足令海內測度朝政宜追定八使糾舉非法更選忠清平章賞罰三公歲盡差

其殿最使吏知奉公之福營私之禍則眾災之原庶可塞矣

五事臣聞古者取士必使諸侯歲貢孝武之世郡舉孝廉又有賢良文學之選于是名臣輩出文武竝興漢之得人數路而已夫書畫辭賦才之小者匡國理政未有其能陛下卽位之初先涉經術聽政餘日觀省篇章聊曰游意當代博奕非曰教化取士之本而諸生競利作者鼎沸其高者頗引經訓風喻之言下則連偶俗語有類俳優或竊成文虛冒名氏臣每受詔于盛化門差次錄第其未及者亦復隨輩皆見拜擢旣加之恩難復收改但守奉祿于義已弘不可復使理人及仕州郡昔孝宣會諸儒于石渠章帝集學士于白虎通經釋義其事優大文武之道所宜從之若乃小能小善雖有可觀孔子曰爲致遠則泥君子故當志其大者

六事墨綬長吏職典理人皆當曰惠利爲績日月爲勞褒責之科所宜分明而今在任無復能省及其還者多召拜議郎郎中若器

用優美不宜處之冗散如有釁故自當極其刑誅豈有伏罪懼考
反求遷轉更相放効臧否無章光帝舊典未嘗有此可皆斷絕已
覈真偽

七事伏見前一切已宣陵孝子者爲太子舍人臣聞孝文皇帝制
喪服三十六日雖繼體之君父子至親公卿列臣受恩之重皆屈
情從制不敢踰越今虛偽小人本非骨肉旣無幸私之恩又無祿
仕之實惻隱思慕情何緣生而羣聚山陵假名稱孝行不隱心義
無所依至有姦軌之人通容其中恆當作桓思皇后祖載之時東郡

有盜人妻者亡在孝中本縣追捕乃伏其辜虛偽雜穢難得勝言
又前至得拜後輩被遺或經年陵次已暫歸見漏或已人自代亦
蒙寵榮爭訟怨恨凶凶道路太子官屬宜搜選令德豈有但取丘
墓凶醜之人其爲不祥莫與大焉宜遣歸田里已明詐偽後漢蔡邕傳

諫用三互法疏

藝文類聚六十
作幽州刺史議